



14. februar 2022

UPA 2022/119

Inatsisartut ingerlatsinermut maleruagassaasa § 33 tunggavigalugu Inatsisartunut ukuningga aaliangiiffigisassatut siunnersuuteqarpunga:

Inatsisartut aalajangiiffigisassaattut siunnersuut, Naalakkersuisut peqquneqassasut misissuissasut Royal Arctic Line Kalaallit Nunaata iluani avammullu assartuinissamut sullissinissamik akuersissutaata atuukkunnaarsinneqassappat pitsaaqutissai ajoqqutissaalu, taamatuttaarlu assartuinnermut unammilleqatigiinneq eqqullugu. Misissuineq takussutississavaa sullissinissamik akuersissut peerlugu unammilleqatigiinnermillu eqqussineq aningaasatigut kingunissai qanoq isikkoqarnersut. Misissuineq Inatsisartunut UPA 2023 nallertinnagu tunniunneqassaaq.

(Inatsisartunut ilaasortaq Jens-Frederik Nielsen, Demokraatit)

Tunggavilersuut

Royal Arctic Line akilersueriaasia innuttaasunut inuussutissarsiortunullu paasiuminaassinnaasarpog, assartuinnermut akitigut, ilanngaatitigut, akitsuutitigut assigiinngitsutigullu akilersueriaaseqarnera peqqutigalugu.

Taamaattumik Royal Arctic Line Naalakkersuisullumi oqarunik assartuinnermut aki 2015-miilli qaffanneqarsimangitsoq ilumoorpoq¹. Taamaattoqaraluartorli innuttaasunut inuussutissarsiortunullu Royal Arctic Line kiffartuussinera atorniaaraanni akisunerungaatsialernikuusimavoq. Tamanna ilanngaatigineqartartunut, akitsuutinut allatigullu akinik qaffaanernit peqquteqarpoq.

December 2021-mi assersuutisasqqissumik takuvugut, Royal Arctic Line pigasuartumik uuliamut aningaasallu nalinginut tapiliuttagaq 13,6 procentimut qaffammasuk 1/1-2022-miit atuutilersussanngorlugu. Qaffaangaatsiarneq 7,3 procent pointimik.

Pissutsini allamiissimagaanni imaluunniit nunarsuup ilaanni allamiissimagaanni akitigut qaffaarujussuarnerit taamaattut kiffartuussisumut allamut nuunnermik kinguneqarsimassagalarpoq. Kisiannili Kalaallit Nunaannut avammullu imaatigut assartuinnerni taamaassinnaangilagut. Tamaani Royal Arctic Line atortariaqarparput. Naalakkersuisullu tamanna allanngorusunngilaat.

Naalakkersuisut § 37 tunggavigalugu apeqquteqaammut 192-2021 ima akipput:

”Royal Arctic Linep akuersissutaata atorunnaarsinneqarnissaa pilersaarutigineqanngilaq. Kalaallit Nunaannut, Kalaallit Nunaannit, Kalaallit Nunaatalu iluani imaatigut assartuinnerup avammut ammanerulersinneqarnissaa, piffissami qaninnerusumi misissorluarnegarnikuunngilaq. Taamaalluni aamma naatsorsuusiorfigineqarnikuunngilaq.”²

Demokraatit isumaqarput kisermaassineq tamanna iliuseqarfigisariaqaleripput. Kiffartuussinermi unammilleqatigiittoqarnissaa kissaatigaarput. Taamaattumik siunnersuutigaarput Naalakkersuisut

¹ https://ina.gl/documents/para3637/2021/svar/192_2021_RAL_JFNI_akissut.pdf

² https://ina.gl/documents/para3637/2021/svar/192_2021_RAL_JFNI_akissut.pdf



peqqissaarullugu misissuinissaat, kisitsinertalimmik ersarissarlugulu pitsaaqutit ajoqqutillu Royal Arctic Line sullissinissamik isumaqatigiissutaata peernerata kingunissai. Iluaqutertaqanngilaq nunatut periuseriuaannarsimasagut malillugit ingerlaannaraluarutta. Ineriartortitsisariaqarpugut.

Demokraatiniit pingaartitaraarput inuiaqatigiit unammilleqatigiinneq iluaqutigissagaat. Isumaqarpugut sullissinermik akikinnerulersitsinermillu malitseqartartut. Isumaq tamanna aamma imaatigut assartuinnermut atuuppoq.

Neriuppugut Inatsisartut Naalakkersuisullu misissuinissamut siunnersuutigineqartoq ilalissagaat.

Pisortanut aningaasatigut allaffissornikkullu kingunissai

Misissuinissamut siunnersuutigineqartoq suliarinerata atorfiliup ukiumut suliarisartagaasa 500.000 koruuninik naleqartartup qaangernissaanik nalilerneqanngilaq.

Namminersorlutik inuussutissarsiateqartunut aningaasatigut allaffissornikkullu kingunissai

Soqanngilaq

Innuttaasunut aningaasatigut allaffissornikkullu kingunissai

Soqanngilaq